

# Coanshari imapisopita ninshitërinso'

## Quisocristo no'tëquën anitotërinpoaso'

**1** <sup>1</sup>Iso quirica a'pataranquëma', ni'co!. ¿Noyanquëma' canpitanta'? Quiyanta' isëquë noya ya'huarai. Quisocristo noya noya nohuitacamaso marë' ninshitaranquëma'. Iráca co'huara isoro'pa' ya'huëyátërasohuë', inápaquë ya'huërin. Ina quëran o'marahuaton, a'chintërincoi, natanai. Quiyaso' ni'nai. Nirayarai. Nonën chachin ya'huëtërin, sé'huarai. Inasáchin Yosë yonquirinso' anitotërinpoa'. Ina nohuitohuatëhua', nóya nanpimiatarihua'. <sup>2</sup>Isoro'paquë o'mahuachina, quiyariso' ni'nai. Nohuitatoi, sha'huitarainquëma'. Inaso' nanpimiatarin. Iráca inápaquë ya'huërin. Tata Yosërë chachin ya'huërin. Napopináchin yonquipi. <sup>3</sup>Inápaquë ya'huaponahuë', o'mahuachina, piyapicoi ni'nai, a'chininsonta' natanai. Pa'pionta' anohuitërincoi. Hui'nin nohuitatoi, nohuitërai. Nipayarëso pochin ninai. Napoaton ninshitaranquëma' canpitanta' Quisocristo nohuitacamaso marë'. Quiya pochachin Yosë nohuitoco' nipayarëso pochin nicacamaso marë'. <sup>4</sup>Ina pochin cancantohuatama', nóya cantarihua'. Ina marë' ninshitaranquëma'.

## Tahuëri pochin nininso'

<sup>5</sup>Noya nanan Quisocristo anitotërincoi. Ina nanan chachin sha'huitaranquëma'. “Yosëso' noyasáchin

ninin. Tahuëri pochin cancantërin. Co pi'pisha tëranta' tashi pochin cancantërinhuë',” itërincoi. <sup>6</sup>Tashi pochin cancantohuatëhua', co Yosë nohuitarihuahuë'. “Yosë nohuitërahuë',” tapomarahuë', co noyahuë' cancantohuatama', nonpinama'. Co no'tën nanan imaramahuë'. <sup>7</sup>Yosëso' noyasáchin ninin. Tahuëri pochin cancantërin. Canpoanta' tahuëri pochin yonquihuatëhua', Yosë nohuitarihua'. Naporahuaton, noya ninitëhua' ya'huarihua'. Hui'nin chachin chiminin ni'ton, ya'ipi oshanënpoa' inquitarinpoa'. Huënainën quëran anoyacancantarinpoa'.

<sup>8</sup>“Co oshahuancohuë',” topatëhua', canpoara ninonpintërehua'. Co no'tëquën yonquirëhuahuë', co tëhuënchachin imarëhuahuë'. <sup>9</sup>Onporosona co noyahuë' nipatëhua', Yosë nontahua'. “Tëhuënchachin co noyahuë' nicato, oshahuanco,” topatëhua', Yosë oshanënpoa' inquitarinpoa'. Co nonpintërinpoahuë'. Quisocristo chiminin ni'ton, nanitërin ya'ipi oshanënpoa' inquitinpoaso'. Noyápiachin cancan quëtarinpoa'. <sup>10</sup>“Ya'ipinquëma' co noyahuë' ninama',” itërinpoa' Yosë. Napotopirinpoahuë', “Noya ninahuë. Co caso' oshahuancohuë',” topatëhua', “Yosë nonpintërinpoa',” tënëhuaso pochin cancantërehua'. Nanamën no'tëquën sha'huitopirinpoahuë', co tëhuënchachin natërehuahuë'.

### Nanan anoyatërinpoaso'

**2** <sup>1</sup>Quisocristo imarama' ni'ton, hui'nahuëpita pochin ni'nanquëma'. Ninshitaranquëma' noyasáchin nicacamaso marë'. Nipirinhuë', co noyahuë' nipatëhua', Quisocristo catahuarinpoa'. Oshahuanëhua' ni'ton, ana'intinpoaso' ya'huëpirinhuë'. Canpoa marë' Yosë nontaton, nanan anoyatarinpoa'. Inaso' no'tëquënáchin yonquirin. <sup>2</sup>Ya'huërënamënpoa' chiminin ni'ton, nontohuatëhua', oshanënpoa' inquitarinpoa'. Oshanënpoa' inquitatonpoa', nanan anoyatërinpoa'. Ya'ipi piyapi marë' chiminin. Ya'ipinpoa' oshanënpoa' inquitinpoaso' nohuantopirinhuë'.

<sup>3</sup>Yosë nohuitohuatëhua', pënëninpoaso' natëarëhua'. No'tëquë'n natëcaso' nohuantarihua'. Ina natëhuatëhua', tëhuë'nchachin Yosë nohuitërahua'. <sup>4</sup>A'naquënso nipirinhuë' "Nani Yosë nohuitërahuaë," topirinahuë', pënëninpoaso' co natëtonahuë', nonpiánpi. Co no'tëquë'n yonquipihuë'. <sup>5</sup>Yosë nanamën natëhuatëhua', noya noya Yosë nosoroarihua'. Ina pochin cancantohuatëhua', tëhuë'nchachin ina nohuitarihua'. <sup>6</sup>"Yosë imarahuaë," topatëhua', Quisocristo pochachin cancantacaso' ya'huërin.

### Nasha pochin pënëninpoaso'

<sup>7</sup>Co iyaro'sa' nasha camaitërinso' ninshitaranquëmahuaë'. Iráca quëran huarë' Yosë nanamën natanama'. "Ya'ipinquëma' noya ninosoroco'," itërinpoa'. Inachachin iporanta' pënënananquëma'. <sup>8</sup>Co nasha camaitërinsohuë' niponahuë', nasha pochin ninshitaranquëma' cancänëma quëran huarë' ninosorocamaso marë'. Quisocristo ya'ipi piyapi nosororin. Nosoroatonquëma', a'pintë-rëso pochin anoyacancantërinquëma' tahuëri pochin cancantacamaso marë'.

Ninosorohuatama', co huachi tashi pochin cancantaramahuë'.

<sup>9</sup>A'na piyapi no'huíhuatama', co Yosë imaramahuë'. "Imarahuaë," tapomarahuaë', co tahuëri pochin cancantëramahuë'. Ipora huanta' tashi pochin cancantarama'. <sup>10</sup>Imaramasopita capini ninosorohuatama', tahuëri pochin cancantarama'. Ina pochin nipatama', no'tëquë'n imarama'. <sup>11</sup>Nipirinhuë' nino'huíhuatama', tashi pochin cancantarama'. Co noyahuë' cancantatoma', co manta' yonquiararamahuë'. Co nani-taramahuë' no'tëquë'n yonquicamaso'. Sopai nohuanton, somaraya pochin cancantarama'. Napoaton iyaro'sa', cancänëma quëran huarë' ninosoroco'.

<sup>12</sup>Canpitaso' imarama' ni'ton, ninshitaranquëma'. Hui'nahuëpita pochin nicatë'nquëma', ninshitaranquëma'. Quisocristo canpoa marë' chiminin. Imapatama', oshanëma' inquitërinquëma'. <sup>13</sup>A'naquëma' nani hua'qui' imatoma' a'napita catahuarama' ni'ton, Quisocristo noya nohuitërama'. Inaso' iráca quëran huarë' ya'huërin. Noya imarama' ni'ton, ninshitaranquëma'. Canpitanta' hui'napi'sanquëma', nani sopai minsërama'. Napoaton ninshitaranquëma'.

<sup>14</sup>Ya'ipi imaramasopita hui'nahuëpita pochin ni'nanquëma'. Yosë nohuitërama' ni'ton, ninshitaranquëma' noya noya cancantacamaso marë'. Quisocristo noya nohuitërama' ni'ton, iyaro'sa', ninshitaranquëma'. Inaso' iráca quëran huarë' ya'huërin. Nani tahuëri, apia'huaro'sa', Yosë nanamën yonquiararama'. Napoaton chiníquë'n cancantarama'. Chiníquë'n cancantatoma', sopai nani minsërama'.

### Isoro'paráchin pa'yatopisopita

<sup>15</sup>Na'a piyapi'sa' co Yosë natëtonahuë' nisha nisha yonquipi. Isoro'paquë

ya'huërinsoptaráchin yonquipi. Ama inapita pochin cancantocosohuë'. Ama nani ma'sha nohuantapatocosohuë'. Ma'sha na'con yonquihuatama', co tēhuēnchachin Tata Yosë nosororamahaüë'. <sup>16</sup>Isoro'paquë nisha nisha ya'huërin aoshahuainpoaso marë': Monshihuanacasaráchin cancantëré'. Ma'sha quēnanpatëra, nohuantapatëré'. Ma'huanpatëra, yanocantëré', naporë'. Inapitaso' co Tata Yosë nohuanton ya'huërinhuë'. Sopai nohuanton, ya'huërin. <sup>17</sup>Isoro'pa' ta'huantarín. Ya'lipi ma'shanta' ta'huantarín. Inasáchin pa'yatohuatēhua', topinan quëran nanpiarihua'. Nipirinhuë', Yosë noya imapatēhua', co onporonta' ta'huantarihuahuë'. Ya'huëmiataríhua'.

### Quisocristo inimiconën

<sup>18</sup>Co hua'quiya quëranhuë', apia'hua-ro'sa', Quisocristo o'mantararin. "Cristo yao'mahuachin, inimiconën huë'sarin," itërinënpoa'. Nani natantërama' canpitanta'. Iporaso' na'a piyapi'sari Cristo yainimicotopi. Napoaton o'mantacaso' tahuëri naniriarín, tēnhua'. <sup>19</sup>"Quiyanta' imarai," topirínahuë', nani pipipi. Co tēhuēnchachin Yosë huëntonēnquë ya'conpíhuë'. Ya'conpi naporini, co pipiitonahuë'. Pipipi quëran nitotërehua'. "Co onporonta' cancanëna quëran huarë' imapíhuë'," tēnhua'.

<sup>20</sup>Canpitaso nipirinhuë' imarama'. Quisocristo nohuanton, Ispirito Santo ya'coancantërinquëma'. Napoaton no'tëquën yonquirama'. <sup>21</sup>Nitotopiramahuë', naquëranchin pënëantaranquëma' yonquicamaso marë'. No'tën nanan imapatēhua', co nonpin nanan natëarihuahuë'. <sup>22</sup>Tēhuēnchachin nonpin nanan sha'huitarinënuëma'. "Quisoso' co Cristohuë'. Co Yosë hui'ninhuë'," ta'tona', yanonpintërinënuëma'.

Inapoatona', Quisocristo inimicotapi. Tata Yosënta' a'popi. <sup>23</sup>Yosë hui'nin a'pohuachina', co Tata Yosënta' nohuítapihuë'. "Quisocrisoso' Yosë hui'nin chachin," topachina', Tata Yosënta' imasapi.

<sup>24</sup>Ya'nán imapoma', no'tëquën a'chintërainquëma'. Ina chachin imamiatoco'. Ina imapatama', cancanëna quëran Tata Yosë nohuitarama'. Hui'nionta' noya nohuitarama huachi. <sup>25</sup>Quisocristo chachin sha'huitërinpoa': "Imamiatohuatamaco, Yosë nohuitatoma', nanpiamiatarama'," itërinpoa'.

<sup>26</sup>A'naquën yanonpintarinënuëma' ni'ton, ninshitaranquëma'. <sup>27</sup>Canpitaso nipirinhuë' Ispirito Santo ya'huëtërinquëma'. Quisocristo imarama' ni'ton, ina nohuanton, ya'coancantërinquëma'. Nani tahuëri a'chintarinquëma'. Cancanëmaquë Yosë nanamën a'chintarinquëma'. Co onporonta' nonpintërinquëmahuë'. No'tëquën a'chintërinquëma' ni'ton, co a'napita a'chintinquëmaso' ya'huërinhuë'. Ina natëhuatama', no'tëquën yonquiarama'. Sha'huitërinquëmaso pochachin Quisocristo imamiatoco'.

<sup>28</sup>Ipora quëran huarë', apia'huaro'sa', Quisocristo imamiatoco'. Inapohuatama', o'mantahuachin, co tapan ya'huëtërinquëmahuë'. Co pa'yana-ramahuë'. <sup>29</sup>Quisocristo noyasáchin ninin, nitotërehua'. Napoaton Yosë huëntonēnquë ya'conpatēhua', noya nicarihua'. Inpitasona noya nipachina', nani Yosëri anoyacancantërin ni'ton, hui'nin pochin ni'sarin, tēnhua'.

### Yosë hui'ninpita

**3** <sup>1</sup>Ma noya Tata Yosë nosororínpoa' ni'ton, hui'ninpita pochachin ni'ninpoa'. Huëntonēnquë chachin aya'coninpoa'. Co imapisopitasohuë' nipirinhuë' co nitotopíhuë'.

“¿Onpoatonta' Yosë pochin cancantacaso' nohuantopi?” toconpi. Co Yosë nohuitatonahuë', napopi. <sup>2</sup>Na'con, iyaro'sa', nosororanquëma'. Iporaso' Yosë hui'ninpita pochin ni'ninpoa'. A'na tahuëri noya noya acoarinpoa'. Onpopinsona nicarihua' nimara. Co ya'ipi nitochatërarëhuahuë'. Nipirinhuë', Quisocriso o'mantahuachin, nirayarihua'. Ina ni'patëhua', ina pochachin nicarihua'. <sup>3</sup>“A'na tahuëri Quisocriso ni'sarëhua',” ta'tëhua', co noyahuë' yonquirëhuasopita naniantarëhua'. Quisocrisoso' noyápiachin cancantërin ni'ton, canpoanta' noyápiachin cancantacaso' nohuantarihua'.

<sup>4</sup>Yosë pënëninpoa'. Co ina natëhuatëhuahuë', oshahuanëhua'. Co noyahuë' nipatëhua', co Yosë natë-rëhuahuë'. <sup>5</sup>Noya nanan nani nitotërama'. Quisocriso o'marin oshanënpoa' inquitinpoaso marë'. Inaso' co pi'pisha tëranta' oshahuaninhuë'. <sup>6</sup>Tëhuëenchachin imapatëhua', nóya nisarëhua'. Co pa'yatarihuahuë' oshahuanacaso'. Nani tahuëri co noyahuë' nipatëhua', co Yosë nohuitë-rëhuahuë'. Co ya'coancantërinpoahuë'. <sup>7</sup>Ni'cona, apia'huaro'sa', nisha a'china'piro'sa' nonpintochinënquëma'. Noya nipa-tëhua', noya cancantarëhua'. Quisocriso noya ni'ton, ina pochin cancantacaso' ya'huërin. <sup>8</sup>Nani tahuëri co noyahuë' nipatama', sopai imarama'. Iráca quëran huarë' sopai co noyahuë' cancantaton, oshahuanin. Inaso' nonpintohuachinpoa', canpoanta' oshahuanarëhua'. Napoaton Yosë hui'nin o'marin sopai minsëaton nicha'ëinpoaso marë'. Ya'ipi oshanënpoa' inquitohuachinpoa', co huachi sopai natëcaso' ya'huërinhuë'.

<sup>9</sup>Huëntonënquë chachin Yosë aya'coninpoa' ni'ton, co iporaso' pa'yata-rëhuahuë' oshahuanacaso'. Hui'nin

pochachin cancantatonpoa', yonquinën chachin quëtërinpoa'. Nasitantarëhuaso pochin ninëhua'. Napoaton co huachi nohuantarihuahuë' oshahuanacaso'. <sup>10</sup>Co sacaihuë' Yosë hui'ninpita nohuitacaso'. Noyasáchin nipatëhua', Yosë hui'ninpita pochin nisarëhua'. Nipirinhuë', co noyahuë' nipachina', co Yosë huëntonënquë ya'conpihuë'. Co imapisopita nosorohuachinahuë', co Yosë hui'ninpita pochin nisapihuë'. Sopai hui'ninpita pochin nisapi. Co noyahuë' cancantopi quëran sopai hui'ninpita nohuitarëhua'.

#### Ninosorocaso' ya'huërinso'

<sup>11</sup>Ya'nán imapoma quëran huarë' Yosë nanamën natanama'. “Noya ninosoroco',” itërainquëma'. <sup>12</sup>Iráca Cainoso' sopai natëton, iin tëparin. ¿Ma'marëta' tëparin? Inso' noya ninin ni'ton, no'huiton, tëparin. Ama ina pochin cancantocosohuë'.

<sup>13</sup>Napoaton iyaro'sa' co natëpisopitahuë' no'huihuachinënquëma', ama pa'yancosohuë'. <sup>14</sup>Iráca canpoanta' ina pochin co noyahuë' cancantë-rëhua'. Co Yosë nohuitatëhuahuë', chimipi pochin nipirëhuahuë', Yosë anoyacancantërinpoa' ina nohuitatëhua' nanpimiatacaso marë'. Napoaton iporaso' ninosororëhua'. Ina quëran Yosë huëntonënquë ya'conëhuaso' nitotë-rëhua'. Co ninosorohuatamahuë', co Yosë anoyacancantërinquëmahuë'. Chimipi pochin cancantarama'. <sup>15</sup>A'na piyapi no'huihuatama', tëpatona'piro'sa' pochin Yosë ni'sarinquëma'. Tëpatonapiro'saso', co Yosë pochin nanpimiatacaiso ya'huërinhuë'. <sup>16</sup>Quisocrisoso' nipirinhuë' na'con nosoroatonpoa', nicha'ëinpoaso marë' chiminin. Chiminaton, nosororinpoaso' anitotërinpoa'. Inapochachin iyaro'sa', ya'ipi Quisocriso imapisopita

nosorocaso' ya'huérin. Na'con ninosoroa'ahua'. Quisoso ya'huèrenamënpoa' chiminso pochachin nosorocaso' ya'huérin. <sup>17</sup> Quisocriso imarèhuasopita capini noya ninosorocaso' ya'huérin. A'napita ma'sha pahuantohuachina', catahuahua'. Capa capacaiso' nipachin, capa a'mocaiso' nipachin quètahua'. Co inapita catahuahuatèhuahuè', co tèhuénchachin nosororèhuahuè'. Co canpoa capini ninosorohuatèhuahuè', co Yosènta' nosororèhuahuè'. <sup>18</sup> “Ya'ipi imapisopita nosororahuè,” topatèhua', ama, apia'huaro'sa', topinan quèran napoa'huasohuè'. Cancanënpoa quèran huarè' nosoroatèhua', catahuahua'.

**Co tè'huatatèhuahuè'  
Yosè nontèrèhuaso'**

<sup>19</sup> Tèhuénchachin a'napita nosorohuatèhua', no'tèquèn Yosè nanamèn imasarèhua'. Ina quèran co huachi tè'huatacaso' ya'huètarinpoahuè'. “Tatanpoa pochin ni'ton, noya ni'ninpoa',” ta'tèhua', noya cancantarihua'. <sup>20</sup> Co noyahuè' nipatèhua', cancanënpoa quèran nitotatèhua', sètèrèhua'. Co noyahuè' ninèhuaso' Yosènta' nitotèrin. Napoaponahuè', cancanënpoa quèran huarè' yaimapatèhua', inanta' nitotèrin. Ina nitotaton, nosororinpoa'. Ina yonquihuatèhua', noya cancantatèhua', Yosè nontarihua'. <sup>21</sup> Napoaton iyaro'sa', cancanënpoa quèran a'naya a'nayanpoa' yonquia'ahua'. “Yosè noya ni'sarincó,” topatèhua', co Yosè tè'huatarihuahuè'. Co tè'huatatèhuahuè', nani tahuèri ina nontarihua'. <sup>22</sup> Yosè pènèninpoaso' natèhuatèhua', noya natanarinpoa'. Ina nohuantèrinsoáchin yonquihuatèhua', catahuarinpoa'. Ina pochin cancantohuatèhua', ma'pitaso nipatèhua', quètarinpoa'. <sup>23</sup> Yosè nani pènèninpoa' hui'nin imacaso marè'.

Naporahuaton, ninosorocasonta' sha'huitèrinpoa'. “Quisocrisonta' inachachin sha'huitèrinpoa',” ta'tèhua', cancanënpoa quèran natèhua'. <sup>24</sup> Yosè natèhuatèhua', yonquirinso-ráchin imasarihua'. Imapatèhua', ya'coancantomiatèrinpoa'. Ispirito Santo quètèrinpoa' ya'coancantinhoaso marè'. Ina catahuahuachinpoa', noya nisarèhua'. Ina quèran Yosè nohuitèrèhuaso' nitotèrèhua'.

**Nonpin nanan a'chinpiso'**

**4** <sup>1</sup> Na'con iyaro'sa' nosororanquéma' ni'ton, pènèranarquéma'. Na'a nonpin nanan pènèntona'piro'sa' nonpin nanan a'chinapi. “Yosè nanamèn a'chinahuè,” topirinahuè', co no'tèquèn a'chinpihuè'. Napoaton a'chintohuachinèinquéma', ama a'naroáchin natètocosohuè'. “Nonpin nanan nimara,” ta'toma', yonquico'. Ya'ipi Yosè quiricanèn quèran a'chintèrinpoaso' yonquiatoma', tantiaco'. Co ina pochin a'chintohuachinèinquémahuè', ama natècosohuè'. <sup>2</sup> Ispirito Santo no'tèquèn anitotèrinpoa'. “Quisocriso Yosè hui'nin nipoahuè', isoro'paquè o'maton, piyapi chachin nasitimarín. Nonèn chachin ya'huètèrin,” itèrinpoa'. Ina nanan a'chintohuachinèinquéma', no'tèquèn a'chinapi. Ispirito Santori ayonquirin ni'ton, noya nonsapi. <sup>3</sup> A'naquénso nipirinhuè' sopai nohuanton, nonpinapi. Co Quisocriso nanamèn no'tèquèn a'chinpihuè'. “Yosè hui'ninso' co piyapi chachin nasitimarínhuè',” toconpi. Inapitaso' Quisocriso inimicotopi. Co ina pochin Ispirito Santo anitotèrinpoahuè'. Iráca ninorinso chachin nani Cristo inimiconèn natantèrèhua'.

<sup>4</sup> Canpitaso' apia'huaro'sa', Yosè hui'ninpitanquéma' ninama'. No'tèquèn yonquiatoma', nisha a'china'piro'sa'

minsëarama'. Sopai nohuanton, nonpin nanano'sa' a'chintopirinënquëmahué', Ispirito Santo nani ya'coancantërinquëma'. Inaso' sopai quëran chini chiníquën nanantarin ni'ton, catahuahuachinpoa', co nonpin nanano'sa' natëtarihuahué'. <sup>5</sup>Inapitaso nipirinhué', co Yosë nohuitatonahué', co nanamën chachin a'chinpihué'. Isoro'paquë ya'huërsopitaráchin yonquiatona', inahuara yonquinëna quëran a'chinpi. Napoaton co imapisopitasohué' nonpin nanan natëpi. <sup>6</sup>Quiyaso nipirinhué' Yosë nohuitatoi, no'tëquën a'chinai. Yosë imapisopita noya nataninacoi. Inaso' no'tën nanan, topi. Co imapisopitasohué' nipirinhué', co yanatërinacoihué'. Ispirito Santosoi' no'tëquënáchin nonin. Napoaton nonpin nanan pa'yatopisopitasoi' co Ispirito Santo yanatëpihué'. Ina quëran nonpin nanano'sa' nohuitërhua'.

#### **Iráca quëran huarë' Yosë nosororinpoaso'**

<sup>7</sup>Yosë pa'pi nosororinpoa'. Napoaton iyaro'sa', canpoanta' noya ninosoroa'ahua'. Huëntonënquë aya'conpachinpoa', catahuarinpoa' a'napita nosorocaso'. Nosorohuatëhua', Yosë nohuitarihua'. Hui'ninpita pochin ni'ninpoa'. <sup>8</sup>Inaso' nosoromiatochinarinpoa'. Napoaton canpoanta' co a'napita nosorohuatëhuahué', co pi'pisha tëranta' ina nohuitarihuahué'. <sup>9</sup>Nosoroatonpoa', hui'nin chachin isoro'paquë a'paimarin anoyacancantinpoaso maré'. A'naíchin hui'nin ya'huëtopirinhué', a'paimarin. Quisocristo anoyacancantohuachinpoa', Yosë nohuitatëhua', nampiatarihuá'. <sup>10</sup>Co canpoariso' nosoropirëhuahué', Yosëso' na'con nosororinpoa'. Ina nohuanton, hui'nin chachin o'marahuaton, chiminin. Ya'huërenamënpoa' chiminin ni'ton, oshanënpoa' inquitatonpoa', nanan anoyatërinpoa'.

<sup>11</sup>Yosë na'con nosororinpoa' ni'ton, canpoanta', iyaro'sa', inapochachin ninosoroa'ahua'. Ina pochin cancantacaso' ya'huërin. <sup>12</sup>Co inquënpoa tëranta' Yosë quënanpirëhuahué', noya ninosorohuatëhua', Yosë nohuitarihua', ya'coancantomiatërinpoa'. “Yosë na'con nosororinpoa',” ta'tëhua', canpoanta' noya noya ninosoroarihua'. <sup>13</sup>Yosë huëntonënquë ya'conpatëhua', Ispirito Santo a'patimarinpoa' ya'coancantinpoaso maré'. Hua'yanën chachin ni'ton, cancandenpoaquë ayonquirinpoa'. “Tëhuëenchachin Yosë ya'coancantërinpoa',” tënëhua'. <sup>14</sup>Tata Yosëri hui'nin isoro'paquë a'paimarin nicha'ëinpoaso maré'. Quiyarisoi' ni'nai. Nani tahuëri piyapi'sa' sha'huitárai. <sup>15</sup>“Quisocristoso' Yosë hui'nin. Ina natërahue,” topatëhua', Yosë pochin cancantatëhua', imamiatarihuá'. Inanta' ya'coancantërinpoa'.

<sup>16</sup>Yosë nohuitatëhua', natërhua'. “Ma noyacha Yosë nosororinpoa paya,” tënëhua'. Inaso' nosoromiatochinarinpoa'. Canpoanta' nosorohuatëhua', Yosë nohuitarihua'. Yonquirinsoráchin imasarëhua'. Imapatëhua', ya'coancantomiatërinpoa'. <sup>17</sup>Yosë noya nohuitohuatëhua', na'con na'con nosoroarihua'. Ina quëran ayaro' tahuëri nanihuachin, co tē'huatarihuahué'. Quisocristo nosororinpoa' ni'ton, canpoarinta' ina pochachin nosoroarihua'. Napoaton ayaro' tahuëri co pa'yanarihuahué'. <sup>18</sup>Imarëhuasopita capini noya ninosorohuatëhua', co nisitarihuahué'. Inapochachin Yosëre'quënpoa' ninosorohuatëhua', co tē'huatarihuahué'. A'naquën piyapi'saso' na'con tē'huapi. “Yosë ana'intarinco,” ta'tona', tē'huatochinachin cancantopi. Canpoaso nipirinhué' “Yosë na'con nosoroatonpoa', oshanënpoa' inquitërinpoa',” topatëhua', ya'ipi tē'hua inquitarinpoa'.



<sup>19</sup>Yosë'ton na'con nosororinpoa' ni'ton, canpoarinta' Yosë nosoroatëhua', a'napitanta' nosoroarihua'. <sup>20</sup>A'naquënso' "Yosë nosororahuë," taponahuë!, iin no'huirin. Co inaso' no'tëquën noninhuë!, nonpiánin. Piyapi quënanëhua'. Yosëso nipirinhuë! co quënanëhuahuë!. Piyapi quënanarihuarahuë!, co nosorohuatëhuahuë!, aquëtë huarë! Yosëso' co nanitarëhuahuë! nosorocaso'. <sup>21</sup>Quisocristo pënëninpoa!. "Nosorohuatamaco, piyapinta' nosoroco!," itërinpoa!.

### Onporahuatësona Yosë imamiatacaso'

**5** <sup>1</sup>Ya'ipi Quisocristo imarëhuasopita a'na huënton pochin ninëhua'. "Quisocristo Yosë hui'nin chachin," tënëhua' ni'ton, huëntonënuë ya'conëhua!. Hui'ninpita pochin ni'ninpoa!. Ni'co!. "Quëmapi tëhuëenchachin nosorohuatëra, hui'ninpitanta' nosororë!," topi. <sup>2</sup>Napoaton Yosë nosorohuatëhua!, pënëninpoaso' noya natëhuatëhua!, tëhuëenchachin hui'ninpitanta' nosoroarihua!, tënahuë. <sup>3</sup>Yosë nosorohuatëhua!, pënëninpoaso' no'tëquën natëarihua!. Catahuahuachinpoa!, nanitaparëhua!. <sup>4</sup>Canpoaso' Yosë hui'ninpitana' ni'ton, nanitaparëhua' sopai minsëcaso!. "Quisocristo catahuarinpoa!," topatëhua!, co noyahuë! yonquirëhuasopita naniantarihua!. Isoro'paquë na'a ma'sha, piyapi, inapita ya'huërin anishacancantinpoaso marë!. Nipirinhuë!, Quisocristo yonquihuatëhua!, catahuarinpoa' imamiatacaso!. <sup>5</sup>"Quisocristo Yosë hui'nin chachin," topatëhua!, achinicananinpoa' sopai minsëcaso marë!. A'napitariso' co nani-topihuë! sopai minsëcaiso!.

### Yosë anitotërinpoaso'

<sup>6</sup>Quisocristo isoro'paquë chachin o'marin. O'mahuachina, Yosë nohuanton,

i'quë aporihuanin. Nani ya'ipi sha'huitërinso' tiquiaton, corosëquë chimin-pachina, huënainën pa'nin. Co topinan aporihuaninhuë!. Oshanënpoa' inquitinpoaso marë! chiminin. Naporahuaton, Ispirito Santonta' cancanënpoa quëran anitotërinpoa!. Inaso' no'tëquën sha'huitërinpoa!. "Quisososo' Yosë hui'nin chachin," itërinpoa!. <sup>7-8</sup>Tata Yosë noya anitotërinpoa' hui'nin natëcaso!. Ni'co!. "Caraya'pi inachachin sha'huihuachina, naporo huarë! natëtëre!," topi. Inapochachin cancanënpoaquë Ispirito Santo sha'huitërinpoa!. Quisocristonta' i'quë aporihuanin, ya'ipiya Yosë natërin. Naporahuaton, canpoa marë! chimin-pachina, huënainën pa'nin. Cara chachin napopináchin anitotërinpoa!. <sup>9</sup>Piyapi'sa' inachachin sha'huihuachina, natëtërehua!. Yosëso nipirinhuë! noya noya ni'ton, no'tëquënachin nontërinpoa!. Napoaton ina sha'huitohuachinpoa!, na'con na'con natëtacaso' ya'huërin. Nani Yosë sha'huitërinpoa' ni'ton, "Quisocristoso' Yosë hui'nin chachin. Ina nicha'ërinpoa!," tënëhua!. <sup>10</sup>Yosë nani sha'huitërinpoa' ni'ton, imarëhuasopita nitotërehua!. Cancanënpoa quëran anitotërinpoa!. A'napitaso nipirinhuë!, co Yosë natëpihuë!. "Quisososo co Yosë hui'ninhuë!. Co nicha'ësarinpohuë!," ta'tona!, Yosëri nonpintërinso pochin cancantopi. No'tëquën sha'huitopirinpoahuë!, co natëpihuë!. <sup>11</sup>Yosëso' huëntonënuë aya'coninpoa' ina pochin nampicaso marë!. Hui'nin chachin anoyacancantërinpoa' nampimiatacaso marë!, tënëhua!. <sup>12</sup>Yosë hui'nin ya'coancantohuachinpoa!, nampimiatarihua!. Co'so' ina imapatëhuahuë!, co nampimiatarihuahuë!.

### Chiniquëncancantatëhua', imamiatahua'

<sup>13</sup>Canpitaso' Quisocristo natërama!. "Inaso' Yosë hui'nin ni'ton, imasarahuë!,"

topatama', huëntonénquë nani aya'co-ninquëma'. Ina nohuitatoma', nampiatiarama. Ina nitotacamaso marë' ninshitaranquëma'. <sup>14</sup>Yosë nontohuatëhua', natanarinpoa'. Ina nohuantërinso chachin natanpatëhua', noya nataninpoa'. <sup>15</sup>“Noya nataninpoa',” ta'tëhua', ina ninahua' nohuantërinso chachin quëchinpoa'. “Co onporonta' nonpintarinpoahuë', acotarinpoa',” ta'tëhua', noya cancantarihua'.

<sup>16</sup>A'naquën Yosë imamiatapona-huë', co noyahuë' ninin. Co Yosë a'poaponahuë', oshahuanin. Inapita marë' Yosë nontahua' anoyacancan-chin. A'naquënso nipirinhüë' imapirinhüë', co noyahuë' yonquiaton, Quisocristo chachin a'pomiatërin. A'pomiatohuachina, chiminpi pochin cancantantapi. Co inapita marë' Yosë nontacaso' ya'huërinhuë'. <sup>17</sup>Co noyahuë' nipachina', oshahuanpi. Nipirinhüë', co Yosë a'pomiatohuachinahuë', cha'ësapi.

<sup>18</sup>Yosëri imarinsopita huëntonénquë aya'conin. Noyasáchin nicacaso' ya'huërin. Yosë hui'nini chachin a'paiarin. Sopairi yanonpintopirinhüë', Quisocristori catahuarin ni'ton, co sopairi minsëarinhuë'.

<sup>19</sup>Imarëhuasopitaso' Yosë hui'nin-pitanpoa' ninëhua'. A'napitaso nipirinhüë' co imapihuë' ni'ton, sopairi hua'anëntërin. Camaihuachina, ina natëpi. Ina nitotërehua'.

<sup>20</sup>Yosë hui'nin chachin o'maton, no'tëquën Yosë anohuitërinpoa'. Inasáchin no'tëquën yonquirin. Yosë nohuitatëhua', yonquirinsoráchin imasarëhua'. Quisocristo nohuitërehua' ni'ton, catahuarinpoa' no'tëquën yonquicaso marë'. Inaíchín Yosëso' ni'ton, chinotacaso' ya'huërin. Ina nohuitohuatëhua', nampimiatarihua'. <sup>21</sup>Apia'huaro'sa'. Mamanshiro'saso', co moshacaso' ya'huërinhuë'. Yosëíchin chinotahua'. Nani huachi.

*Coansha*